

**Siunnersuut uunga: Atuagaateqarfiiit pillugit Inatsisartut inatsisaat nr. Xx, xx. 2014-meersoq**

**Kapitali 1**

*Siunertaq nassuaatillu*

**§ 1.** Atuagaateqarfiiit atuakkat, atuagassiat, naalaagassat atorniarneqarsinnaasullu allat akeqanngitsumik inersimasunut meeqqanullu atugassanngortillugit qaammarsaaneq, ilinniartitaaneq kulturikkullu ingerlatsinerit siuarsassavaat, tassunga ilanngullugit elektroniskimik paassisutissiiviit, takujulli kapitali 5, paasisitsiniaasassallutillu.

*Imm. 2.* Atugassanik atuagaateqarfiiit atugassanngortitaannik toqqaanermi pitsaassuseq, tamatigoortuuneq pissusiviusunik tunngaveqarnerlu pingartinneqassapput. Upperisarsiornermi, ileqqorissaarnermi politikkikkulluunniit tunngaviit aalajangiisuussanngillat.

**§ 2.** Atuagaateqarfiiit innuttaasunut paasisitsiniaanerit inuiaqatigiinnullu paassisutissiinerit allat ingerlateqqittassavaat.

**Kapitali 2**

*Kommunit atuagaateqarfii*

**§ 3.** Kommunalbestyrelsit kommunini tamani innuttaasunut atuagaateqarfinnik pilersitsissapput.

**§ 4.** Kommunini innuttaasunut atuagaateqarfiiit tassaapput atuagaateqarfik pingarneq immikkoortortallu kommunini pissutsit malillugit pisariaqartut, tassunga ilanngullugit illoqarfinni nunaqarfinnilu atuagaateqarfiiit. Innuttaasut amerlassusaat tunngavigalugu immikkoortortaqarfinnik sumi pilersitsisoqassanersoq communalbestyrelsit aalajangissavaat, ataqatigitillugu sumiiffimmi atuagaateqarnermut tunngasutigut pigisat.

*Imm. 2.* Kommuneqarfik Sermersumi atuagaateqarfik pingarneq tassaavoq Nunatta Atuagaateqarfia.

*Imm. 3.* Atuagaateqarfinni pingarnerni aqutsisut suliamik ingerlatsinermi naleqquttumik tunuliaquaqassapput.

**§ 5.** Atuagaateqarfinni pingarnerni inersimasunut kiisalu meeqqanut suli atuartunngorsimannngitsunut aamma sullisisussamik immikkoortortaqassaaq.

*Imm. 2.* Immikkoortortaqarfii ilaatigut meeqqanut inersimasunullu atukkiunneqarsinnaasunik aalajangersimasunik katersugaateqartuaannassapput ilaatigullu atuagaateqarfinnit pingarnernit atorniarsimasanik uninngasuuteqassallutik.

**§ 6.** Innuttaasunut atuagaateqarfiit atuarfinnilu atuagaateqarfiit malittarisassat Naalakkersuisunit aalajangersarneqartut malillugit meeqqanut atuagaateqarfinni sullissineq suleqatigiissutigissavaat, tak. Meeqqat atuarfiat pillugu Inatsisartut inatsisaanni § 27, imm. 3.

## Kapitali 3

### *Nunatta Atuagaateqarfia*

**§ 7.** Nunatta Atuagaateqarfia nuna tamakkerlugu atuagaateqarfiit ingerlataannik ingerlatsisuusoq Naalakkersuisunit ingerlanneqarpoq.

**§ 8.** Nunatta Atuagaateqarfiani pisortamik Nunatta Atuagaateqarfiani ulluinnarni aqutsisussamik Naalakkersuisut atorfinitssitsisarput. Nunatta Atuagaateqarfiani pisortaq bibliotekaritut ilinniarsimassaaq imaluunniit allamik naleqquttumik suliamik ingerlatsinermi tunuliaquteqassalluni.

*Imm. 2.* Nunatta Atuagaateqarfiani pisortaq Nunatta Atuagaateqarfiani sulisunik atorfinitssitsisarpoq.

**§ 9.** Nunatta Atuagaateqarfiata kommunini atuagaateqarfiit atuakkanik atugassanillu allanik atuagaateqarfiit namminneq piginngisaannik pissarsiniarneranni tapersertassavai, pisariaqartumillu annertussusilimmik atuagaateqarfeqarnermi periutsinik tapersertassallugit.

*Imm. 2.* Nunatta Atuagaateqarfia innuttaasunut atuagaateqarfinnut allanut atuagaateqarfeqarneq pillugu siunnersuisassaaq.

*Imm. 3.* Naalakkersuisut atuagaateqarfeqarnermi periutsinik atuagaateqarfeqarnermilu tapersiisarnerup annertussusaat pillugit annertunerusunik malittarisassiorsinnaapput.

**§ 10.** Nunatta Atuagaateqarfia kommunini atuagaateqarfinnut kalaallisut atuakkanik pisisarpoq agguaasarlunilu.

*Imm. 2.* Naalakkersuisut pisisarnerit agguaasarnerillu imm. 1-imni taaneqartut pillugit malittarisassiorsinnaapput.

**§ 11.** Nunatta Atuagaateqarfia kalaallit kulturimi kingornussaasa qulakkeerneqarnissaannut peqataassaaq siunertalarugu tassunga eriagisarialinnik katersukkanik (Groenlandicami katersukkanik) atuakkanik tamanik Kalaallit Nunaanni saqqummiunneqartunik katersuisassaaq, nalunaarsuisassaaq paarinnillunilu.

*Imm. 2.* Groenlandicami katersukkat ukuningga imaqassapput:

- 1) Kalaallisut atuakkat, aviisit, atuagassiat naqitallu allat kiisalu atukkiussassat isiginnaarneqarsinnaasut, naalaarneqarsinnaasullu tamaasa.
- 2) Kalaallit Nunaanni kulturimi atukkatigut anersaakkullu ineriertorneranik takutitsissutissatut nunap assinginik assilissanillu katersukkat.
- 3) Kalaallit atuakkiortut manuskriptiinik manuskriptinillu allanik katersukkat Kalaallit

Nunaanni kulturip atukkatigut anersaakkullu ineriartorneranik takutitsissut.

**§ 12.** Nunatta Atuagaateqarfia Groenlandicap katersugaataanut atatillugu issittumi pissutsit pillugit sammisallu Kalaallit Nunaanni inuiaqatigiinnut pingaaruteqartut pillugit atuakkanik, atuagassianik atugassanillu allanik ilisimatuussutsikkut atuagaateqarfimmik ineriartortitsissaq.

**§ 13.** Innuttaasut Groenladicami katersukkanik takunnissinnaanissaat Nunatta Atuagaateqarfiata qulakkiissavaa nunatsinnilu kulturikkut kingornussat ilaannik, tamannalu Nunatta Atuagaateqarfiata akisussaaffigivaa ilisimasanik misigisanillu ingerlatitseqqiisassalluni.

## Kapitali 4

### *Atuagaateqarfimmiiittuutisiaqartitsisarneq*

**§ 14.** Inunnut, assersuutigalugu atuakkiortunut, nutserisunut, ilusilersuisartunut assiliisartunullu, kalaallisut atuakkat naalaagassallu pilersinneqarnerannut tamakkiisumik ilaannakortumilluunniit tapersiisunut atuagaateqarfimmiiittuutisiat pillugit Inatsisartut aningaasanut inatsimmi aalajangiisarput.

*Imm. 2.* Aningaasat imm. 1-imi taaneqartut agguaanneqartarnerat pillugu Naalakkersuisut annertunerusunik malittarisassiussapput, tassunga ilanggullugu inunniq imm. 1-imi taaneqartunik killiliineq taakkulu akornanni atuagaateqarfimmiiittuutisionik pillugit agguaasarneq.

## Kapitali 5

### *Atuagaateqarfinni sullissinermi maleruagassat*

**§ 15.** Nunatta Atuagaateqarfia kommuninilu atuagaateqarfiit sullississutaannut immikkut ittunut, atugassanik atukkiussisarnerup nalinginnaasumillu ilitsersuinerup saniatigut, atuagaateqarfiit sullissinerannut tunngassuteqartunut sumiiffinnilu atorneqartartunit annertunerusunut akiliisitsisinnaapput. Aammattaaq Kalaallit Nunaata avataani atuagaateqarfinnut atortunik inniminnerneqartunik atukkiussinermi akiliisitsisoqarsinnaavoq.

*Imm. 2.* Sullississutit akilersinneqartussaatitaasut imm. 1-imi taaneqartut atuisumit erseqqissumik piumasarineqarsimassapput.

*Imm. 3.* Naalakkersuisut communalbestyrelsillu Nunatta Atuagaateqarfiata sullissutaannut akilersinneqartussaatitaasunut imm. 1-imi taaneqartunut akiliutit annertussusissaat akiliisitseriaasillu aalajangertarpaat. Akiliutit sullississutigineqartunut aningaasartuutinit annertunerussanngillat.

**§ 16.** Nunatta Atuagaateqarfia kommuninilu atuagaateqarfiit piffissap atukkiussiffiup

qaangerneqarnerani akiliisitsisinnaapput. Akiliut atukkanut ataatsikkut atuisup atugaanut ataatsikkullu utertinneqartussanut annertunerpaamik 20 kr.-iussaaq, kisiannili meeqqat inuusuttullu 15-it inorlugit ukiulinnut atorniartunut annertunerpaamik 10 kr.-iussaaq. Ullunik arfineq marlunnik qaangiuttoorneq sivisuneruppat akiliut 50 kr.-mut qaffanneqarsinnaavoq, kisiannili meeqqanut inuusuttunullu 15-it inorlugit ukiulinnut atukkanik annertunerpaamik 20 kr.-it. Qaangiuttoorneq ullunik 30-nik sivisuneruppat allakkatigullu atortunik atukkanik utertitsisoqaqqusisoqarsimappat akiliut 100 kr.-mut qaffanneqarsinnaavoq, kisiannili meeqqanut inuusuttunullu 15-it inorlugit ukiulinnut atorniartumut annertunerpaamik 50 kr.-it.

*Imm. 2. Nunatta Atuagaateqarfia kommuninilu atuagaateqarfiit atorniarnermut allagartartaaqqinnermi qaffasinnerpaamik 20 kr.-nik akiliisitsisinnaapput.*

**§ 17.** Nunatta Atuagaateqarfia kommuninullu atuagaateqarfiit atuisumut ataatsimut atuagaateqarfinnit atukkiinissamik itigartitsisinnaapput, atuisoq

- 1) atukkat ajoqusernagit atukkanik utertitsisussaatitaaneq kingusinaarujuussuarnikkut unioqqutissimappagu, imaluunniit
- 2) § 16 malillugu akiliummik aalajangerneqartumik akiligassaminik kinguaattooqqappat imaluunniit atukkanut ajoquserneqarsimasunut tammarneqarsimasunulluunniit taarsiilluni akiliutissanik kinguaattooqqappat.

*Imm. 2. Atuisup atuagaateqarfimmut akiligassani, tak. imm. 1, akilerpagit, tassunga ilanggullugit atukkat ajoqusersimatinngagit utertippagit imaluunniit atukkat ajoquserimasut taarserpagit kiisalu akiliutissat akilerneqarsimanngitsut akilerpagit atorniaqqusajunnaarneq atorunnaassaaq.*

*Imm. 3. Nunatta Atuagaateqarfiata kommuninilu atuagaateqarfiit atuisoq malittarisassanik, tak. § 20, imm. 2, annertuumik arlaleriarluniluunniit unioqqutitsippat atuagaateqarfimmik atuisinnaajunnaarsissinnaavaat. Taamaattoqarpat atuisinnaajunnaarsitsineq qaammatit pingasut qaangernagit siumut sivisussusilerneqarsimassaaq.*

**§ 18.** Nunatta Atuagaateqarfia kommuninilu atuagaateqarfiit ikittuinnarnik akisuunik atukkiussassaateqarpata imaluunniit angerlaallugit atorniarneqarsinnaannginnerat allanik pissuteqarpat atukkat angerlaallugit atorsinnaanerat atuagaateqarfiit killilersinnaavaat.

*Imm. 2. Atugassat imm. 1-imí taaneqartut angerlaallugit atorneranni qularnaveeqquummik atuagaateqarfiit akiliisitsisinnaapput.*

**§ 19.** Atuagaateqarfiit atukkiussassatut uninngasuutaat pissutigalugit atorniarsimasut ataasiakkaat atorneqarsinnaasut innimingersinnaasaallu katillugit amerlassusissaannik atuagaateqarfiit malittarisassaanni aalajangersaasinnaavoq.

## Kapitali 6

*Ilitsersuineq, malittarisassat tunniussisussaatitaanerlu*

**§ 20.** Nunatta Atuagaateqarfia kommuninilu atuagaateqarfiit atuagaateqarfinnik atuinermi atugassaritinneqartunik atuisut ilitsersortassavaat, tassunga ilanngullugu ilaatigut atorniarnermut allagartaat, atorniarnermut piffissaliussat, qularnaveeqqutaasinnaasunik akiliisitsisarneq, atukkanik ajoquusersimanagit utertitsissutaatitaanerup malinneqannginnerata kingunissaat, akiliisitsisarneq akiliutillu akiliisitsiniarternerlu pillugit paassisutissiassallutik.

*Imm. 2.* Nunatta Atuagaateqarfia kommuninilu atuagaateqarfiit atuagaateqarfinni malittarisassanik aalajangersaassapput, tassani atortorissaarutinik atuisarneq, pissusilsortarneq ileqqorissaarnissarlu ilanngunneqassallutik.

*Imm. 3.* Atuagaateqarfiit malittarisassaat atuagaateqarfinni saqqummiunneqassapput, qinnuiginnittoqartillugulu atuagaateqarfinnik atuisunut tunniunneqassallutik.

**§ 21.** Atuakkanik, aviisinik, atuagassianik, ukiumoortumik nalunaarusianik, kiisalu cd-rom-inik, video-nik, dvd-nik naalaagassanik saqqummiunneqartussanik naammassillugit suliaqartut, saqqummiussaminnik tamarmik immikkut pingasunngorlugit Nunatta Atuagaateqfianut tunniussisussaapput.

*Imm. 2.* Pinngitsoorani tunniussisussaatitaaneq imm. 1-imi taaneqartoq pillugu Naalakkersuisut malittarisassiorsinnaapput, tassunga ilanngullugu saqqummiunneqartunik allanik imm. 1-imi taaneqartunik tunniussisussaatitaaneq.

## Kapitali 7

*Aningaasalersuineq*

**§ 22.** Nunatta Atuagaateqarfiata ingerlatsinera nunap karsianit tapiissuteqarnikkut aningaasalersorneqartarpoq.

*Imm. 2.* Nunap karsianit ukiumoortumik tapiissutit ukiumut aningaasaliiffiusumut tulliuttumut aningaasanik inatsisip akuerineqarneranut atatillugu Inatsisartunit aalajangerneqartarput.

*Imm. 3.* Nunatta Atuagaateqarfia isertitsissutaasinnaasunik ingerlataqarsinnaavoq.

**§ 23.** Kommunini atuagaateqarfinnik ingerlatsinermi pilersitsinermilu aningaasartuutit tamaasa kommunit akilertarpaat, aningaasartuutit Namminersorlutik Oqartussanit allanilluunniit tamakkiisumik ilaannakortumilluunniit akilerneqarnissaannik inatsisini ersarissumik pisinnaatitsisoqanngippat.

## Kapitali 8

*Pineqaatissiinerit*

**§ 24.** Najoqqtassat, § 21, imm. 2 naapertorlugu suliakkiissutigineqartut, Kalaallit Nunaanni pinerluttulerinermi inatsit malillugu akiliisitsinermut malittarisassat malillugit pineqaatissiissutit aalajangersaavigineqarsinnaapput.

*Imm. 2.* Najoqqutassat § 21, imm. 2 naapertorlugu suliakkiissutigineqartut, tunngavissippaa akiliisitsinermik aalajangersaaneq, Kalaallit Nunaanni pinerluttulerinermi inatsit malillugu inatsisitigut pisinnaatitaasumut pisussaatitaasumullu akiliisitsisoqarsinnaavoq.

*Imm. 3.* Akiliisitsinermik pineqaatissiissutit imm. 1-2 naapertorlugu aalajangikkat, nunap karsianut nakkartinneqassapput.

## **Kapitali 9**

*Atuutilersitsinermut atorunnaarsitsinermullu aalajangersakkat*

**§ 25.** Inatsit 1. januar 2015-imi atuutilersinneqarpoq. Bibliotekeqarneq pillugu Landstingip peqqussutaa nr. 4, 15. oktober 1979-imeersoq tassunga peqatigitillugu atorunnaarsinneqarpoq.

*Imm. 2.* Malittarisassat aalajangersarneqarnikut imaluunniit inatsisartut peqqussutaanni taaneqartumi imm. 1 naapertorlugu atuuttut atorunnaarnissaasa tungaanut imaluunniit inatsisartut inatsisaat una inatsisilluunniit allat naapertorlugit malittarisassanik aalajangersarneqartunik taarserneqarnissaasa tungaanut atuutiinnassapput.

*Namminersorlutik Oqartussat, xx. xx 2014.*

Aleqa Hammond